



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Khel Ratna Award atema Chhetri tenung benoktsü: AIFF

"NIA-i BJP den tasa atonga kü taküm agitsü merager" - Akhil Gogoi



VOL. XVIII NO. 257 (ADOK 257) DIMAPUR

YANGTEPNÜ (THURSDAY)

CHITENI (JULY) 01, 2021

₹ 5.00

COVID-19 Nagaland: Nisung 1,341 anepaludar; 495 süogo

Kohima, June 30, 2021 (TYO): Bodbarnü Nagaland nung nisung 128 dak COVID-19 putet, 165 taneptsü angu aser nisung 2 asü. "Tanü nisung 128 dak COVID-19 putet. Parnokji Kohima nung 51, Dimapur nung 25, Mokokchung nung 23, Peren nung 12, Phek nung 5, Zunheboto nung 4, Mon o Wokha nung asemsem (3) aser Kiphire nung 2 lir," ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 165 taneptsü angu. Parnokji Kohima nung 45, Mon nung 39, Mokokchung nung 26, Dimapur nung 24, Kiphire, Longleng o Peren nung tenetnet (7), Phek nung 6, Zunheboto nung 3 aser Wokha nung 1 lir. Parnok züngsema taneptsü angur ajak agi nisung 22,699 kümogo" ta paisa ashi.

Dimapur nung COVID-19 puteta alir nisung ana asü aser tena züngsema tasür ajak agi nisung 495 kümogo saka nisung 14 bo tanga

tashidak ajanga asü, ta Dr Kikon-isa metetdaksü.

Nagaland nung COVID-19 alitsü akok ta bilemba sample 2,26,675 tendangogo. RT-PCR ajanga 97,822, TrueNat ajanga 61,732 aser Rapid Antigen Test ajanga 67,121 tendang, ta Dr Kikon-isa ashi.

"Mongulbar tashi nung nisung 4,35,664 nem COVID-19 vaccine indang dose 4,96,026 agütsüogo," ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,103, healthcare workers 15,799, arishi küm 45 ser tempapur 1,50,275 aser arishi küm 18 nungi 44 tsüingda alir 2,09,487 lir, ta paisa ashi.

"Vaccine agirtem rongnung nisung 60,362-i dose anaprong agiogo. Parnokji frontline workers 28,944, healthcare workers 10,494, arishi küm 45 ser tempapur 20,913 aser arishi küm 18 nungi 44 tsüingda alir 11 lir," ta Dr Thurr-ia metetdaksü.

Dmr aser Kma nung Odd-Even inyakyim alitsü

Dimapur, June 30, 2021 (TYO): Dimapur district nung July 1 nungi 11, 2021 tashi Odd-Even traffic system beshitsü, ta Commissioner of Police Dimapur, Rothihu Tetso-i metetdaksü.

July 10, 2021 tashi Dimapur district nung Odd-Even inyakyim nung essential movement indang garitem dang senzüdaksütsü, ta paisa ashi.

Külen, Kohima DC & DTF

Chairman, Gregory Thejawelie, NCS-ia sangdong ka nung Kohima Municipal Council telongtet nung nija garitem Odd-Even system nung senzüdaksütsü metetdaksüogo.

Hombor, Bodbar aser Hokolbar anogotem züngdangba 1,3,5,7,9 agi tembangba garitem senzütsü.

Mongulbar, Brihostibar aser Honibar anogotem züngdangba 2,4,6,8,0 agi tembangba garitem senzütsü.

Centre-i Nagaland nung AFSPA atsülanger

Dimapur, June 30, 2021 (TYO): Centre sorkari ita trok atema Nagaland ajanga "disturbed area" ta sangoktsüogo. Iba ya June 30, 2021 nungi December 31, 2021 tashi asütsü.

"Nagaland state ajanga nung tensa majung lir aser lendongi aitsüsa lir anungji civilian yimsüsüba nung armed forces teyari nungdaker" ta Bodbarnü

Union Home Ministry-i metetdaksü.

"Anungji, Armed Forces (Special Powers) Act, 1958 nung Arrla 3 ajanga tashi agütsüba nung ajemdaker Nagaland state ajanga June 30, 2021 nungi tenzüker ita trok atema 'disturbed area' ta sangoktsür" ta Home Ministry indang sangdong ka nung ashi.

Nagaland arrtsü adena atua Assam sepaitem mongdagi



Mokokchung district nung Tzurangkong kübok Vihoto nunger lushi nung Assam police atuagi bunker aser ki yanglur amongba noksa nung angur. June 30, 2021

Dimapur, June 30 (TYO): Taoba ita May 27 nü Mariani assembly constituency nungi adokba MLA-i anir Nagaland arrtsü telongi aitba mapang timtem tera adokba sülen, ano yashi Mongolbar nübo Assam police-tem noklang dak tali atuagi

Naga nunger lu raksaja alu mapa inyaka aotsü nokdangba agi Assam-Nagaland arrtsülen tensa mejungi kümogo.

Iba timtem adokba ya Mokokchung district kübok Tzurangkong nung Sema yimtsüing

Nagaland sorkari Unlock 1.0 inyakyim metetdaksü Aonung 7 nungi anepdang 4 ako senzüsenbong noktanger

Kohima, June 30, 2021 (TYO): Nagaland state sorkari July 1 nungi 10 tashi Unlock 1.0 atema tetuyubatem agütsüogo. Anogo 10 atema sorkari talenba aika salatsüogo aser maparen aika tenzüshiba den teinyaktsütema dena lir.

June 28, 2021 nung High Powered Committee on COVID-19-i lemetetba nung ajemdaker Nagaland Chief Secretary, J Alam IAS-i Unlock 1.0 atema tsüinglanglen agüja aliba teinyaktsütem metetdaksüogo.

- Anepdang 6:00 ako nungi nikondang 2:00 ako tashi dokan/shishilembadak ajak lapoktsü melar. Essential goods & commodities ayokertembo anogoshia lapoktsü akok saka tanga oset ayokba dokantembo anogo lemsar lapoktsü atema District Task Force temi inyaktsü akok.

- Dokan shia nung hand sanitizers ayutsüla aser mapang ajak nung COVID-19 inyakyim beshitsüla.

- District Task Force temi kou

mejepdak aser saloon nung mapa inyakerem vaccine agiba sülen ang lapokdaksütsü.

- Nagaland nung sorkar office ajak anogoshia staff 50% attendance lia lapoktsü akok aser mapang ajak nung COVID-19 inyakyim sülen anidaksüla. Office-i maoba 50% staff ji mashii anogo nung kidang nungi mapa inyaktsü aser rondak office nungdak atema phone/mail ajanga tongteprateptsü.

- State nung nija office tem nunga 50% attendance lia lapoktsü melar aser COVID-19 inyakyim beshitsü.

- July 1 nungi aonung 7:00 ako nungi anepdang 4:00 ako tashi nisung aser gari senzüsenbongba noktanger.

- Public transportation aser non-essential services atema district balala tsüingda senzüba maneni noktanger.

- Kiyimba, asüpila aser sports training nung nisung 50 tashi adenshitsu melar aser COVID-19 inyakyim beshiba den SOPs sülen anidaksü.

- Tamangba yimsü dak sendakba tesemtem/tenla ki nung nisung 50 tashi adenshitsu melar aser COVID-19 inyakyim beshiba den SOPs sülen anidaksü.

- Item tetuyuba dak alia District Task Force temi COVID-19 menatepba azioktsü atema pei pei telongtet nung inyakyim akangshia inyaktsü tashi agütsür.

Dimapur:

New Market, Hongkong Market aser Hazi Park nung aliba dokan ajak Odd-Even inyakyim nung Hombor, Mongulbar, Brihostibar aser Hokolbar anogotem lapoktsü melar. Iba atema DMC Administrator-i inyakyim latettsü.

Barber shop, Salon aser Spa nung inyaker ajak vaccine agiba sülen ang lapoktsü melar. Iba atema dokantemi Administrator, DMC, Administrator, Chumukedima Town Council/ Medziphema Town Council/ Niuland town Council mesüra concerned Area Administrative Officer dangi shidi zülutsüla.

Dimapur nung yipden 50 aliba COVID-19 ward lapokogo

Dimapur, June 30, 2021 (TYO): Dimapur Civil Hospital nung tanü yipden 50 aliba Covid ward balaka lapokogo. Iba ya Round Table India aser 41 Clubs India-i 'One More Breath' mapatong kübok yanglutsüogo.

Parnoki Rs 70 lakh endoka Covid ward nung nungdakba ajak agütsü aser iba ya Indian Red Cross Society (IRCS) indang Dimapur branch ajanga inyak.

Bodbarnü Health & Family Welfare Minister, S Pangnyu Phom-i Covid ward lapoktsü.

Dimapur civil hospital nung Covid agi shirangertem dang anepalua aru saka June 28, 2021 nung state sorkari tanga tashidak agi shirangertema yaritsü telemtetba agiogo.

"Iba anogo ya Dimapur nung alirtem atema tongtipang anogo ka lir. NGO-i medical department aser State sorkar den yaritepa

Minister Pangnyu-i Nishtha Tele-track sayatsü

healthcare facility tajungtiba agütsütsü atema inyakba mapa nung yaritepba atema kanga pelar" ya Minister Pangnyu-i ashi.

Dimapur deputy commissioner aser IRCS Dimapur branch president Rajesh Soundararajan-ia o jembidang "Dimapur ya Nagaland atema kishi aser shishilembadak tongti tesem ka lir" ta ashi.

"Nagaland nung Covid puteter rongnungi 60% tashi Dimapur nung puteta liasü. Tangbo tensa tajungba kümogo saka asenok yimbazüa malitsüla" ta DC Rajesh

Soundararajan-isa ashi.

"Round Table India Trust-i mozü kidang Covid anepalutsü atema teyari tulu agütsüba atema pelar" ta paisa shisem.

Round Table India Trust Delhi nungi Navin Kejriwal-ia Dimapur nung IRCS züngsemtem, doctor aser nurse tem den Delhi aser Guwahati nung pa den yariteper ajak dang pelaba metetdaksü.

Nishtha Tele-track: Maneni, tanü Minister Pangnyu Phom-isa online ajanga Nishtha Tele-track sayatsüogo.

Iba ya Nagaland nung COVID-19 agi shirangertem anepalua reprangtsü atema Isolation care model ka lir.

(Maneni tapak 2 nung...)

tasen ka tenung agi Vihoto nunger lushi nung lir. Angazükba agi, Vihoto yimtsüing ya tamalen küm 20 shi jakdang akümba Vikuto yimtak nungi razüka orr taoba küm ana asemka jakdang akümba yim tasen ka lir. Vikuto aser Vihoto yimtsüingtem na ya Tsürangkong nung Chungtiayimsen, Moayimti aser Aoküm yimtem den arrtsüsa kümä lir. Tanü iba osangbeneri Tzurangkong Senso Mungdang nung tir Wb.Moa Hoki den jembidang, pai ashiba agi, tamalen Vikuto yim akümdang kidanger Ao yimtsüingtem den angatettepa arrtsü ladanger külenang yimji aküm aser iba yimtsüing ya Sema nunger yim süaka, iba yimtsüing ya Mokokchung district kübok lir aser election tsütsüa Alongtaki Assembly Constituency nung dena lir.

Yashinep yakta ajungbena ka dang Assam police-temji Additional SPkati anir atua yim tasenba Vihoto yimer meyong lu raksatsür, yangji parnok amongtsü tesem mesemtetä sü ki asütsü tenzüker. Tangbo yangji Assam policetem-ji tongpang rara ayongtsü renemer amai raraba hadir tesashi bener bunker yanglur nükdagi. (noksa nungji reprangangma).

Assam tsütsüa Assam government-i arrtsü nung yangluba Border Road ka lir aser tangbo iba arrtsü lenmangji adena atuagi Naga tenem nung Assam police-temji Additional SPJorhat-i anir ki yanglur atua alitsü tenzüker. Parnokjibo rarai atuba amai renema lir ta Tsürangkong lenir den jembidang paisa ashi.

Yashi arrtsülen timtem atalokba osang angashia tanü Nagaland nung ADC Mangkolembai anir Civil SDO Merangmen, Border Magistrate aser Dobashi-tem timtem atalokdak Vihoto lushi jagi

lur Assam police aser Assam Forest ketdangsertem ajurua jembio. Ajisüaka, Assam police-temjibo meyipa melui noklang dak tema sü ki aser bunker yanglur Vihoto nunger lushi nungjisa mongdagi.

Yashi Assam police-temi timtem agütsüba osang angashia, Tzurangkong Range Naga Youth Front telok nungi lanurtem kar yashisa timtem atalokba tesemji tonga luagi Assam police-tem dang, state ana tsüingda timtem lendong tuluba ataloka maotsü atema, meyipa alutsü takangba agütsüogo.

Nagaland tsütsü nungia nübertem dak timtem lendong mataloktsü atema parnok anüktsü asoshi 12 IR nungi sepa kar yoka lir. Tang Assam-Nagaland nung atalokba timtem ya Mokokchung aser Jorhat DC na ajurutepa jembiba sülenang süngjemtsü teimla lir..

Tanü nungi Kohima district nung Unlock-I tezüker

Dimapur, Aami/June 30 (TYO): Kohima District nung July 1, 2021 nungi July 10, 2021 tashi Unlock Phase-I aliba mapang tenokdangbatem kar salaba indang Deputy Commissioner aser Chairman, District Task Force, Kohima, Gregory Thejawelie ajanga metetdaktüogo, aser itemji yamai alitsü:

- i. Kohima District Task Force aser özüng amshirtemi nüburtem aliba tesem ajak nung "NO MASK-NO MOVEMENT" aser "NO MASK-NO ENTRY" yimya akang akanga amshidaktsüsü.
- ii. Aonsotsü, ango/shi aleper, mamatzü ayokba tesem, bakeries, local grocery store tem densema tongtipang osettsüset ayokba dokan aser business establishment ajunga Hombar, Mongulbar, Hokolbar aser Honibar anogotem anepdang 6:00 ako nungi nikongdang 2:00 ako tashi lapoktsü melatsü. Dokan/business kiburi dokanem nung nisung tali manioktsüla. Akok tashi cashless mode nungi senotsü tsütateptsü ajungshir.
- iii. Kohima Municipal area telungzük aser temeket nung aliba ki/compound ka nung dokan ka dak tema aliba nung lapoktsü asoshi melaba anogo nung dokan shilem 50 dak lapoktsü atema kibur/ketdangsurü sentong yanglutsüla aser chitepa aliba dokan ana anogo kasa nung melapoktsüla. Kohima Municipal Council ajanga KCCI den osang agitepa nungdakba maparen anepalutsüsü aser mita repringtsü.
- iv. Pharmacy dak alak Pt. ii nung shia aliba dokan aser business establishment ajunga Bodhbar, Brehostibar aser Deobar anogotem shibangtsü.
- v. Restaurants/ eateries tem anogoshi take-away/ food delivery atema lapoktsü melatsü. Ajisüaka customer ajungai chiyongtsü ataba mapang physical distance yimya den ajaki mask agiba aser teka müreka aliba yimyatem amshitsüla.
- vi. LPG aser e-commerce service tem anogoshi lapoktsü melatsü.
- vii. Telemsa ajak indang delivery personnel temi parnok indang gari nung Vaccination Status sayutsü ajungshir. Mapang

ajak nung teka/temang nung mokongshii osettsüset agütsüsüla aser kechi südir süaka Mask/glove agütsüsüla, teka müreka ayutsüla aser tetsüngta aittsüla. Akok tashi cashless mode nungi senotsü tsütateptsü ajungshir.

- viii. D o k a n / b u s i n e s s establishment ajak nung tesemdang temi amshitsü atema hand sanitizer ayuba aser mapang ajak nung COVID-19 nungi jenbuttsü yimya amshiba den külemi dokan/business establishment nung dokan kibur/stafftem ajak COVID-19 mozü agiba osang jangja-jangja sayutsüla.
- ix. Ku mejepba dokan, beauty parlour, spa, aser salon amala, kong nisung pila alitsü tamakoktsü lir, parnoki Kohima District Task Force on Covid-19 dangi item tesem nung inyakertem COVID-19 mozü agiba application yokba aser customer den akok tashi pila alitsü yimyatem amshitetba sülen lapoktsü melatsü. Kohima District Task Force on Covid-19 nungi temelaba agütsüba sülen ang parnok lapoktsü melatsü. Kohima District Task Force on Covid-19 indang temelaba aser Status of Vaccination ya ku mejepba dokan, beauty parlour, spa, aser salon kikumbang nung jangja-jangja yutsüsüla.
- x. District nung sorkar indang office ajunga mashi anogo staff shilem 50 attendance nung lapoktsü akok aser mapang ajak nung COVID-19 nungi jenbua alitsü yimyatem amshitsüla. Tanüngba staff shilem 50 ya pei kidang nungi inyaktsü aser ajungben office nungdak adokba mapang phone/mail ajanga tongteprateptsü akok.
- xi. District nung nija (private) office tema yangji inyaker shilem 50 agi lapoktsü akok, aser COVID-19 nungi jenbua alitsü yimyatem amshitsüla.
- xii. Tekülem ki tem nisung 50 dak tema marudaktsüi lapoktsü melatsü aser COVID-19 nungi jenbua alitsü yimyatem amshitsüla. Nisung 50 adeshiba nung physical distance mamshitetba tekülem ki nung adenertem ajemdaktsüsüla.
- xiii. Kiyimba kulizüng agizükba, asü pila sentong aser saisapong

training agütsüba nung nisung 50 dak tema madentsüla aser COVID-19 nungi jenbua alitsü yimyatem amshitsüla aser mapang shia sangdongba SOP tem amshitsüla. Wedding reception tem maneni shibanga atatsü. Tang shia aliba sentongtem ya kilung nung agütsüba kumra, yangji adener tajemba asütsüla aser mapang ajak nung nisung o nisung tsüngta tawa ayutsüla.

- xiv. Kohima district nung Taxi tem densema Light Motor Vehicles tem iba Office ajanga taoba mapang sangdongba ama ODD-EVEN yimya nung jajatsü.
- xv. Physical distance yimya amshitsü mechi Light Motor Vehicles ajak nung nisung shilem 50 dang amentsü melatsü. Taxi tem nung passenger ana dang mener senzüsü melatsü aser tejaklen menden nung passenger kata mamentsüla aser plastic barrier/sheet inoktsüla. Ajisüaka RTA ajanga lemtetba para (fare) indang osang 06.10.2020 nü sangdongba dak tali Taxi temi para meshitsü memelar. Taxi indang windshield nung Taxi Drive COVID-19 mozü agiba indang osang jangja-jangja neploka ayutsüla, Bus service, two- wheeler taxi service aser motorcycle tesülen nisung amenba memelatsü.
- xvi. Nübur ajunga senzüba aser district telungzük nung tongtipang masüba maparen atema nisung senzüba maneni nokdanga atar.
- xvii. Mela alirtem/medical emergency dak alaka nisung/gari senzüba ajak nikongdang 7:00 ako nungi anepdang 4:00 ako tashi nokdanga alitsü.
- xviii. Application ajunga warroomkohima@gmail.com dangi yoktsü akok. Teyari kar nungdakra Helpline Nos. 6033833879/ 9362705742 nung jembitsü akok.
- xix. Danga inyaksangshi kobasa memelai ali, itemji maneni kanga sashia nokdangtsü. Temalen shia aliba den mapettsüsa inyaksangshiba asoshi Indian Penal Code indang Section 188 kübok aser Indian Penal Code indang tapet temzüng kübok merenshitsüsa aibelenogo, ta züngshitsü.

Angh Ravi-i National Doctors' Day salem lemsatsep

Dimapur, Aami/June 30 (TYO): Nagaland Angh Ravi-i sangdong ka ajanga, pa aser Nagaland nung aliba nüburtem tenüng nung Doctor aser tanga healthcare professional tem dang kanga pelaba lemsatsepogo. COVID-19 wara pokteter aliba mapang Doctor aser healthcare professional temi anibelem mesasai nisung takümtem kümzüktsü asoshi pei taküm bendanga agüja inyakdar, ta paisa ashi.

"Parnoki pei taküm lendong nung toktsüba den kinunger adianutem nungi pilar nüburtem tenzüktsü atema kanga bendanga

agüja inyakdar," ta Angh Ravi-i ashi.

Coronavirus wara pokteterba sülen Doctor aser healthcare professional tem aika pei mapa nung nokdaka aliba mapang taküm samaogo aser ni Corona Martyrs tem nem akhümtetushi agütsü, ta pai ashi.

Linük kübok tesem kar nung Doctor aser healthcare professional tem anema inyakba ya terenlok lokti ka nung khenyongi agizüktsü makok ta ashiba den Angh-i iba amala inyakyim aitsüsü aser aibelenertem nem tapet temerenshi agütsüsü ayongzüka liasü.

Nagaland Board of School Education ajanga metetdaktüsür

Dimapur, Aami/June 30 (TYO): COVID-19 tashidak wara mechi school tem shibangtsüsa akum aser academic calendar 2021 nung mapang atakzükja aliba tsüngta kaketshir karbo tenüng zülüokba nung timtem ajurua alitsü akok. Anungji school temi menur arurtem mesüra tashidak wara agi kongshir aliba tanurtem parnok school maneni züngdaktsüsü, ta Nagaland Board of School Education (NBSE) sangdong ka ajanga metetdaktüsü.

Item kaketshir nem admission agütsüba sülen kaketshir indang tejangja aser class ya school ajanga Board nem metetdaktüsüla. Tang tashidak wara mapang kaketshirtem school züngtur küm tum nung anenba indang class telemsa nung osang tejangja bendena July 7, 2021 tashinung nbsenag@gmail.com nem agütsüsü metetdaktüsü.

Tanurtem parnok shisaliok maneni angazükba nung tetsükdaktsü majurutsü atema

Department nung zülüoka aliba school ajaki kaketshir temi nungdakbatem online/offline ajanga peritsüsü imlar, ta ashi.

Tangbo kaketshirtem ajunga kidang online ajanga angazükter, anungji tsüraburtemi shilem tulu agütsü lir, talisa school temi tsürabur/kinunger den sendaktepa par tanur online class nung temolung agüja adener asü masü, ta osang agiteptsüla.

Tesayurtemi kidang inyaktsü agütsüba mapatem (assignment) tsüraburtemi kanga junga anepalutsüla aser lenmangtem sayua repringtsüla. Tanurtem anogoshi online ajanga angazükba nung tsüraburtemi shilem agütsü kanga tongtipang aser online class tem agiba mapang aser tatidang agiba mapang tanurtem tim masüba mapa meiyakdaktsüsüla, ta ashi.

Kaketshirtem immune system tashi itdaktüsü atema chiyongtsü tajung achitsü ajungshir aser temang anema alitsü atema temang rakzüba mapa tem inyaktsü ajungshir, ta NBSE sangdong ajangasa ashi.

Excise department-i "International Day against drug abuse and illicit trafficking" ayongzüka amung

Dimapur, Aami/June 30 (TYO): Commissioner of Excise aser State Excise department kübok tenzükertem ajaki linük nung tanga tesemtem den külemi June 26 nü "International Day against drug abuse and illicit trafficking" sentong ayongzüka agiogo. Iba sentong ya Excise Directorate nung "Share Facts on Drugs, Save Lives" omen nung ajemdaker covid dak sendakba tetuyuba shidak benoka aiogo.

Tongmelang sentong ka

ayongzüka agiba mapang, Commissioner of Excise & Prohibiton, Hotolu Swu-i, ketdangsurtem aser field staff tem ajungshiba den parnok inyakyim aser khuret lephsia metetdaktüsü. Paisa tetushi agizükter ajak nem tenüngsang agütsü aser maneni parnok mapa tajung mesamadaktsüi benshiyonga aotsü ajungshi.

Sentong nung illicit traffickers & smugglers anema tenangzüktepba agi aser Commissioner-i field officer aser personnel 16 nem

Commendation Certificate agüja liasü.

Maneni Addl. Commissioner of Excise, Kevisetuo Angami-i iba anogo ayongzüka amungba indang jembia liasü aser Superintendent of Excise (NC) P Koi Khiamniungan-i temeseppa mozü apuba indang osang tatsü agi metetdaktüsü.

Iba sentong ya Inspector of Excise (NC), Osenrhoni Kikon lenisüba nung agi aser Supdt of Excise (Dmr) T. Arilong longkumer-i sarasademer sentong tenzüka ao.

Dimapur nung yipden 50 aliba...

Iba model ya USAID mapatong NISHTHA ajanga yanglu aser Jhpiego-i mapa küma tenzükter. Nagaland nung COVID-19 kanga putetba district ana-Kohima aser Dimapur nung mezüng tenzükter aser iba ajanga Nagaland nung alirtem ajak

ajangzüktsü imlar. "Nagaland dena linük nung COVID-19 wara tanabuba ajanga takoksa jenti bentsür aruogo. Nisung aika dak COVID-19 putetba ajanga healthcare facility nung masemer aseriba jagi COVID-19 agi tera shirangertembo kidang dang

(TAPAK 1 NUNGI...)

anepalutsüsa aküm aser iba jagi home-based care model ya yanglu" ta Minister Pangnyu-i ashi.

Iba ajanga COVID-19 agi shirangertem kidang dang süaka jungjunga repringtsü aser parnok nem Home Isolation kits agütsüsü, ta paisa ashi.



Security Forces temi June 29, 2021 nü Mon district kübok Tizit nungi Bolero gari ka nung sen lakh ka jenjang yi nguteta nisung ana apu. Pua alisang nisung ana den tena ket nungi ngutetba yi ya maneni asüngdangyatsü atema Tizit Police Station nem agütsüogo.

Mokokchung District nung Anti Malaria ita amung

Dimapur, Aami/June 30 (TYO): Chief medical Officers office nungi sangdong ka ajanga ashiba agi, linük nung tanga tesemtem den jangyu medema Mokokchung district nunga June 1 nungi 30 tashi Anti malaria ita mungogo. Anti malaria ita ya "reaching the zero malaria target" omen nung ajemdaker munga liasü.

Iba sentong ya Dr Tiasunep DVBO, District Consultant, MTS aser ASHA tem lenisüba nung agia liasü. Ita ka tepeyong sentong balala ayongzüka agiba mapang, nüburtem nem tzü bangdaka aliba nokdangtsü aser waste management amala onüktem nung tangazükba agüja

liasü. Inyakyimtem rongnung ano sensaksem, live demonstration, angati agi ramen tashidak tendangba aser ramen mozü lemstüba amala inyakyimtem benoka inyakogo.

Mobile IEC awareness on malaria, LLIN amshitsü koda tongtibang, ASHA temi temang tendangba amala IEC inyakyimtem Mangkolemba, Alongkima, Tsurangkong, Tuli aser Changtongya Block nungi yimtsüngtem shimmer inyaka liasü. Ita ka tepeyong tashidak tendangba mapang ramen agi shiranger ka danga meputet. 2019 küma Mokokchung nung ramen tashidak nisung ka dak danga meputet.



Arunachal Pradesh kubok Longka yim anasa Jairampur Battalion-i Police den yaritepa mita aodang mozü shibelener nisung 3 apu. Iba mapang par asem ket nungi Rs 3.79 lakh alang Ganja aser Rs 1.15 lakh alang Cocaine Grade 4 bena aliba apu.

"NIA-i BJP den tasa atonga kü taküm agitsü merager" - Akhil Gogoi

Guwahati, June 30, 2021 (Agencies): National Investigation Agency (NIA)-i Centre aser state sorkartem den tasa atonga pa tenüng menütsütsü meranger, ta 'Raijor Dal' president Akhil Gogoi-i shidi ka nung ashi.

Iba tasa ya Assam chief minister Himanta Biswa Sarma-i atonga inyaker, ta paisa ashi.

Yashi NIA-i Akhil Gogoi anema ken o kar benoksema sülen pai iba osang metetdaksü.

"Assam sorkar, Centre sorkar aser NIA külemi yaritepa ni anema tasa atonga inyaker. Iba nung Assam CM-i tongti shilem agir. Iba tasa külemi longjemer samatsütsü atema ni public teyari meshir" ta Gogoi-i shidi nung ashi.

"May 2, 2021 nü Sibsagar constituency nungi otsütsüsa takok anguba sülen sorkari ni chioksüba sernung mechok" ta paisa ashi.

June 25 nü special NIA court

kati Chabua Police Station nung benokba ken o ka nung Gogoi metenja liasü. Ano, kasa okadakisa Chandmari Police Station nung ken o ka benoka aliba angadanger.

"Chabua Police Station ken o nung okadaki ni metentsüogo. Okadaki iba ken o benoka angadangsü nungdak mali ta ashi. Ni küm ka ser tesadang tashi NIA-i ni aitsütsüsa kuli kecha melii tepuokdak ayu" ta Gogoi-isa metetdaksü.

"Centre nung BJP sorkari opposition lennirtem anema CID aser ED amshir aser tang parnoki NIA amshir" ta Akhil Gogoi-isa tai tongloksü.

NIA ken o ka nung metentsüba sülen sorkari democracy nung amanger süra Chandmari ken o nunga metentsütsüba liasü. Ajisüaka, parnoki Chandmari ken o angadangsü atema mapang menudaksütsü merang. NIA advocate-i hopta ka meshilok"

ta paisa ashi.

"Tang parnoki ni anema onük talila kar benoksemer. Taoba mapang kulisür kati ni Assam nung kozüjang nungi nashi, aser nisung mesüzükba syndicate ajak ketdang asür ta ashi aser taoba mapang kü dang kiralongrar ta jaloktsüba den ano nashi auyar ta jaloktsüogo" Gogoi-isa shidi nung ashi.

Sorkar atema kuli agütsür kati ni Jharkhand nung martial arts training agiba ta ser noksa ka sayu saka ibaji temenütsüka lir, ta paisa shisem.

"Tanü ken o angadangsüba liasü saka NIA okadaki Assam Advocate General, Debojit Saikia nem ano anogo 10 nü agütsüogo. Iba ya tetsütsüba lir aser iba ama tasa atonga inyakba mengudang. Iba ya kü taküm samatsütsü atema atonga inyakerba lir" ta Akhil Gogoi-isa metetdaksü.

Arunachal nung IRBn jawan 2 mozü shibelenba atema apu

Itanagar, June 30, 2021 (Agencies): Arunachal Pradesh nung Indian Reserve Battalion (IRBn) jawan ana mozü shibelenba nung shilem agiba atema puogo.

IRBn jawan ana ya civilian ka den apu aser parnok ket nungi heroin gram 67.23 ngutet. Tenaprong ya 5th battalion, IRBn nungi lir aser parnok ya tang Pasighat nung mapa

lemzüka lir. "IRBn jawan ana mozü shibelenba maparen nung shilem agiba osang angazükogo. Tena nem CO (Commanding Officer) 5th IRBn aser ketdangsürtemi counseling agütsüogo. 5th IRBn personnel 8 tashi Margherita, Assam nung rehabilitation atema yokdang tena adentsü ashi saka magizük" ta sangdong ka nung metetdaksü.

"Tena senzüba osang ya 5th IRBn indang ketdangsürtem nem osang sangoktsü aser parnoki tena ket nung mozü bena lia apu" ta sangdong nungsa ashi.

IRBn jawan ana den civilian ji Pasighat Police Station ket nung agütsüogo.

Külen, jawan anaprong suspension kubok yuogo aser tena anema departmental inquiry ka asütsü

Tripura Speaker-i IPFT MLA Brishaketu indang shidi magizük

Agartala, June 30, 2021 (Agencies): Bodbarnü Tripura Assembly Speaker Rebati Mohan Das-i Indigenous People's Front of Tripura (IPFT) MLA, Brishaketu Debbarma indang shidi magizük.

Tripura nung IPFT ya BJP den yariteper aser parnok indang MLA Brishaketu-i Mongulbar nikongdang Tripura Assembly Speaker nem resignation letter agüja liasü.

"IPFT MLA Brishaketu-i nisung ka ajanga kü dangi shidi bener yok aser pa kü den majuruteper. Iba ya inyakyim tai lir" ta Speaker Das-i ashi.

Iba shidiji IPFT president NC Debbarma aser chief minister Biplab Kumar Deb dangi yoka liasü.

"IPFT MLA-i kü dangi marui resignation letter bener yok aser ano inyakyim alema kasa shidiji chief minister aser

par party president dangia yok" ta Speaker Das-isa ashi. Iba atema onoki kechi meshii atatsü, ta IPFT assistant general secretary & spokesperson Mangal Debbarma-i metetdaksüogo.

2018 general Assembly election nung Left Front madak takok anguba sülen BJP-IPFT sorkar kümteta liasü. Iba election nung parnoki menden 60 nungi 44 nung takok angu.

BJP-i menden 36 aser IPFT-i menden 9 nung toktepa nungi 8 nung takok ngua liasü.

IPFT MLA-i menden toktsübaji sentong atonga inyakba ka lir aser pai Tipraha Indigenous Progressive Regional Alliance (TIPRA) Motha nung adentsü ta osang ajanga ashi.

Par party-i Tipraland maparen anenba ajanga MLA menden yutsür ta Brishaketu Debbarma-i ashi.



Bodbarnü Manipur CM N. Biren Singh-i Covid-19 anema vaccine agir 100% atongba constituency nem Rs 20 lakh alang sempet agütsütsü ta metetdaksüogo. Manipur nung Member of Legislative Assembly (MLA) temi pei pei constituency nung 100% vaccination asütsü atema maparen ketdangsüa inyaker. (Imphal, June 30)

Assam armed battalion personnel nem ita 1 sodi agütsütsü

Guwahati, June 30, 2021 (Agencies): Bodbarnü Assam Cabinet-i constable nungi sub-inspector (SI) tashi armed battalion personnel nem ita ka sodi agütsütü telemteba agiogo.

Assam chief minister Himanta Biswa Sarma menden ser State Cabinet senden amendang iba telemteba agi.

Ajisüaka, ita ka sodiji pei lemzüka quarters nung kibong malir constable nungi sub-inspector nem dang agütsütsü.

Pei lemzüka quarters nung pei kibong den alirtema pei kinungertem semdangtsü atema anogo 10 sodi agütsütsü.

Assam Cabinet-isa Sootea nungi BJP MLA Padma Hazarika nem Cabinet menden agütsütsü telemteba agi.

"MLA Hazarika-i tang Gorukhuti, Sipajhar nung ali bigha 77,000 amshitsü atema luden ka ketdangsüa repranger aser pai iba mapa tajungba inyaksü atema Cabinet menden lemzüksür" ta tanü Assam chief minister Himanta Biswa Sarma-i metetdaksü.

State Cabinet-isa tang mezüng atema Assam nung cooperative societies 860 shia nem godowns aser tanga teyariamshiba atema Rs 5 lakh agütsütsü.

**GOVERNMENT OF NAGALAND
DEPARTMENT OF ART & CULTURE
NAGALAND : KOHIMA**

NO.AC/PC/3/2019-20 Dated Kohima, the 25th June 2021

In Commemoration of 75Years of India's Independence, the Department of Art & Culture is pleased to invite participants for a Photography Competition on the theme 'Language of Textiles'. Against each of the 14 tribes, 2 (two) participants will be selected and awarded 1st and 2nd prize.

1st- Rs. 8000/- each 2nd- Rs. 4000/- each

Criteria for submission :

- 1) Photograph(s) of original design of textiles worn by men, women and children/youth of the 14 Tribes. (Angami, Ao, Chakesang, Chang, Khamniungan, Konyak, Lotha, Phom, Pochury, Rengma, Sangtam, Sema, Yimchunger, Zeliang) Textiles with modern design will not be accepted.
- 2) Each participant should submit a complete set of photographs comprising of the original design of textiles worn by men, women and children/youth. Name, Contact No. and address to be written behind each photograph.
- 3) A participant can submit entries for 2 (two) tribes.
- 4) Neatly typed out description of the textile captured should accompany the photograph(s) submitted.
- 5) Photographs should be of minimum resolution of 300 dpi and should be submitted in both hard (7" x 9") and soft copies. Mobile photographs will not be accepted.
- 6) Entries should be addressed to the Director, Art & Culture, Kohima, enclosed in 10"x12" size envelope. 'Photo Competition commemorating 75years of India's Independence' should be written on top.
- 7) Last date for receiving submission - 27th July, 2021. Winners will be notified by the Department.
- 8) Department will have the copy right of the images submitted and the winning images will be used in relevant Departmental publications.
- 9) For any queries email : dir_artncul@rediffmail.com

Sd/-
Adela Moa Thong
Director,
Department of Art and Culture,
Kohima - Nagaland.

Issued by DIPR



Bodbarnü Assam kubok Nagaon district nung CPI aser tanga Left party zungsemtemi petrol o diesel jenjang atuba anema lungkak aitba angur. (Nagaon, June 30)



TIR YIMYIM

YIMOBILEM (EDITORIAL)

DIMAPUR YANGTEPNÜ, CHITENI (JULY) 01, 2021

Kibong tila aser tulu

Tang ama alima ajaklen Alima Nütsüng Anogo mong (World Population Day) amongtsüba tenüng nung kibong tila asütsü ajungshitepba mapang ya, asenoka kibong tila ayutsübaji mapangi koma ashir ta bilemdanga kija kibong shia telemtetba agitsü kanga tongtibang kümogo. Iba jagi yashia iba yimobilem nung kasa onük tazüngertem den lemsatepogo. Atangji, jembir dang ashi, kibong tila mesüra tulu kümstsütsübaji meimchir mulung masü saka teyanglur Tsüngrem mulung, anungji asenok mapajibo Tsüngrem sentong angateta anidaksüba dang lir. Aji oda, Tsüngrem sentong angatetsü merangba nungji, asenoki asen taküm jenjang indang bilemdanga tang aser tarutsü nung timmedemi lia aotsü atema telemtetba shitak agia sentongtem yanglutsüba maparentem ajak keta lir. Item mapatem rongnung tongtibangtibaji ketdangsüba ya asütsü, kechiyong Tsüngremi asenok nem soyapokya jenti rena aotsü aser alima nung aliba ajak madak kibur kuma ketdangsütsü tashi aser maongka agüja lir. Iba denji kodang asenoki tanü asen lima aser asenok taküm aser kibong tia jenjang medemdangdir, asenok tamakok tulutibaji Tsüngremi moatsüba madak ketdangmesütetba timtem ya asütsü. Aji oda, asenoki aika aser tuluka aginür, anungji aika aser tuluka mekazüka ayur saka anepalu mesütet mesüra junga ketdang mesütet raksadaksür. Iba ama timtemji kibong aika nung reprangteta, peisasa pei kibong anepalu sütetsüsa kibong nung tanur ka mesüra ana tashika dang sorbo nokdangadoktsü aser kibong tila saka tepela kibong kuma anepalutsü asoshi alima nütsüngmong amongba anogotem nung ajungshir. Ibaji kanga dang terajem shisatsü aser tangatetba tajung agütsüba sentong ka lir, kechiyong kibong nung tanur aika sodena yur memesütet aser anepalu mesütetbaji tsürabur aser tanurtem asoshi dang timtem masü saka alima nung timtemji iba nung jagi tenzüker. Ajisüaka, asenoki yashi iba yimobilem nung lemsatepba amato, asenok ama kin tila aser nütsüng ishika saka alushibo tuluka mekazüka alirtem asoshi, nütsüng renlokba tebilemstü dang nungibo nütsüng ajemba tebilemstüang tuluba akümer. Aji oda, tanü asenok rongnung nütsüng ajemba jenjang ya asadangra, taruba kum 50 tsüngda 2070 tashi nungbo asenok Nagalang nung Naga nung lisopur nütsüng yongsük yabo tang dang nungi noklang nung shilem 40 shi agi ajemadoktsü amai sükdangtetter, kechiyong tang ya asenok kibong teimba ka nung tanur ka mesüra ana dang lir, aser ano aika nung mali. Ano külen reprangdangra, asen lima nung aruagi ayangertem yabo kecha tarendak aser tenokdangba melii sojen asor, anungji pornok teimba teimba akümer aser asenok tajemba tajemba akümer. Iba jenjang nung maneni kum 50 ao nungbo, yimten tsütsüa asenok vote agi asenok madoktsü aser lisopur süaka nütsüng ishinba asünungji tangar nütsüng teimba aliba kin kübok asenok alitsü, kechiyong tapu tapu bilemyonga nübo melira kecha mesütetstü. Iba ama asüng asen lima nung ataloktsüba tiaji kodang bilemdangdir, asenokbo kibong tila masü saka akok tashi kibong tulu akümstü merangtsübajiang shitak asütsü. Ajisüaka, kibong tulu, nübener kibong anepalutsübaji o agi melamelaa jembiba amato temelabo masü, kechiyong tsürabur ana atema kibong nung tanurtem mesütetstüba mapaji, aben süoshi shitak agidaksür anogo nung anaben chi tebok sünga chiyongdaksüba dangbo masü, saka tanü putu nung tanurtem ajak nem kaketshisatsü shitak agütsütsüla aser kinü asüdangyongi tanur shiaji mapang shitak - shitak nung mozü agüja anepalutsüla. Tanü asen lima nung kibong aika balaba aser tanurbo tajung aika moatsür ser nung taküm raksadaksübatemji, asenoki tanurtem nem sayubentsü o junga magütsüba dang masü saka makamait aser matong meperiba agi kaketshisatsü shitak magütsütet aser parnok temang junga anepalu mesütetba ajanga atalokba kulitem asütsü. Iba ama kibong timtem aser takoksa nungi kümzüksü asoshi government teyari aiter. Aji oda, pei lima nung government-i tanur shia nem angati kaketshisatsü tajung agütsütet nungbo, kibong nung tanur ter kaketshidaki yoktsübajia tsüraburtem asoshi tebilemstü masütsü. Aji oda, pei lima nung governmenti angati taneptsü angutsüsa mozü ki tajung yangerttet nungbo, nübener kibongtema manemshilu mapang peii makoktsüsa khuret tulubo majurutsü. Ibaji tanü asen lima nung yimten sentong yanglurtemi kanga süoki ia bilemdangtsüla.

OLEMSABANG

TAYONGZÜKBA OLA

Nüji Mulungjang Tener Mena Angu (Mark 5:15)

- Rev Dr Mar Pongener, Executive Secretary, ABAM.

Yisui nütsüngtem anir Galil tzyüim aser temeküt tesemtem nung tenyaba mapatem inyaka jajadang Gerasin linüki aru. Idakji temenen tanela agi pur nüji mongui aliba nisung ka leprunski nungi adoka Yisu dangi arua ajurutep (Mark 5-1-20). Iba tatalokba nung ajemdaker Aor den tayongzükba olen kar iba sapang ajanga lemsateptsü sarasadema zülur.

Leprunski: Nüji nisungtemibo leprunski nung melitetsü saka temenen tanela agi apuba aser iba talenba nung alirtem asoshi leprunskiji tajungtiba tesem asütsü. Iba nisung dak tashi tulu keta alinung merangsen agia paji alener meyutet kechiaser pai itemji mela mela-a toksa. Shingaia pa mazüoktet. Mangli sangwali leprunskitem aser tenemtem nung ola tulu agi asatena senzü. Pa sasa pa temang nung lung agi ranga nisungtemi tsübuttsüsa litet. Pa dak keta aliba tashiji ulura liasü. Ao kinji ajak nung mezüngpur ta jembir, lokti nung Aorji meraketa repranger, aso ajena tajung tasa, Aorji shisa taka anungji Aori kechi ashir? ta ata-a alir, tazüngba jenjang nung tematiba menden tongtetertem, tular aser tanishir aika adoker. Aori jembibabo tangari asükjang meronga angar. Iba amala asenoki pelatepa jembiteper saka Tsüngremi aser meküta aliba kintemi koma bilemdar ashitsü makok. Tsüngremi Ao kinji kanga meimer aser Aor rongnung Tsüngrem metetba ochishir, tashi tawar, bendanga agüja Tsüngrem tenzükertem aika lir. Saka tashi akaba kin ka dakji Khrista nungi anguba nüji tanela melira aika jembiba aser inyakaka itemji leprunski asoshi tang tapet asütsü. Ola tulu adoka temelenshitsü indang asatena jembiyonga Khristai agütsüba nüji meteni jembiba aser inyakbaji leprunski nungi adokba ola ka dang akümstü.

Legion/Aika: Yisui pa tenüng shiba ta asüngdangdang pai "Kü tenüng Legion kechiaser onok aika lir." ta langzü. Iba nisung dak keta aliba temenen tanelatemji onsara liasü. Tsüngremi meimchirji tabensa nung yanglua toktsü saka tabensaba takümtemji alima tashi balala agi anokshidang Tsüngremi sendong matalokdaksüi aibelen mapatem inyaker. Iba nisung ama tai temenen tashi agi kokdakja temenen tanela aika talenba nungi nüji monguteti alitsüsa kumdaksür. Tanü Tsüngremi asen Aor dang nenoki menaba temenentem kwi lir ta asüngdang nung aseni menaba aser beshiba temenen züngdangtsü makoktsüsa alinung 'Legion/Aika' taji-ang langzütsü akok. Kija taküm, kibong, lokti temenen anogoshia züiner, Tsüngrem mulung chia mamangteter. Tangar dak keta aliba tashi mait angur aser item indangjibo jembir saka asen taküm dak rangloker meshisadanger. Covid-19 ajanga lockdown sür lia aruba mapang media sapang balala nung kija, kibong, lokti aser arogotem dak tashi maittba indang tuteta jembiteper. Ya kanga tajung aser aseni menaba temenentem indang yamai sadema jembitsüji tim lir. Item temenentem indang ola tashi adoka tuteta asatepyong kela asenok temenen talenba küpok ali tashi asenok asatepa ya nüji makaba nisungtem senteper leprunski nung asateper tang asütsü.

Leprunski Nungi Adoka Yisu den Ajurutep: Temenen talenba nungi nüji angutsü asoshi Yisu bushitsüla. Yisu tashi agidang iba ya inyaktetsü. Kum aika Tsüngrem dak amanga arur, lokti nung tanishir inyaker, arogo nung tenzüker aser arogo nung nütsüng tajung ama, nai lokti tebilemstü indang tuteta shiteter, raa jembiteper saka ne dak aser kü dak Khristai agütsüba nüji lir mali? Temenen talenba nungi nüji angutsü asoshi asenoki Yisu den ajuruteptsü jangratsüla. Wara tesashi agi amokmerena tetsübu agi sünger aliba mapang ka nung temenen talenba ajak nungi nüji nguogo ta shitetsüsa Yisu bushitsüdi.


Nüji Mulungjang Tener Mena Angu: Iba nisungi Yisu bushi aser Yisui temenen tanela ajak aridoktsü aser tatem makaba nüji agütsü. Temenen tanela talenba küpok alar süa alidang Yisu tashi aser temeim agi ni temenen talenba nungi nüji nguogo ta ashitsüji koda jangratemstü. Asen taküm nung temelenshi adokbatem indang asen sasa ashibajia junger saka asen taküm melenshir lia aoba indang külem lisemertemi ajiteta pa/la Khrista nung nüji kümogo ta küli asübaaji ano kanga tajungba masü no?

Hoi Tsüngremi meimba Aortem! kati ka aitsütepa kobika alitsü? kati ka tai kisüng tuteta jembitepa kobika alitsü? Asen lokti aser arogo dak temulung masüba indang kobika asatepba kazütsü? Kati ka dak tamang makai kobika liteptsü? Tanela khuret tejangja makai kobika Tsüngremi ajungba indang jembiteptsü? Tatsüka masü temokonga masü telempet tamang agi kobika Tsüngrem dak amangtsü? Pei ajung asa-a tajangzük kisüng bushia ochi mashiba mapatem kobika inyaka liteptsü? Leprunski nung ya asenoka ano kobika alitsü? Na aser ni koba ama temenen talenba ka agi alena ali shisadangdi. Temenen talenba nungi nüji anguba taküm ka asütsü nungdaker ta angatetra, arungma Yisu bushidi. Khrista nungi nüji tia ngur alirtem asoshi temoa.

Aor ajaki leprunski nung temenen tashi agi alener asatepa aliba jenjang ya toktsür, Khristai agütsüba nüji bushia, nüjiba nguteter, nüji mulungjang tener litep nungbo Tsüngrema kangasa pelatsü südi na? Ajak moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogotemi Miami nung ki chirepba lendong agi kongshirtem yarir



Miami nung 12 ben amentepa asüba ki- Champlain Towers chirepa aliba noksa nung angur.

June 30, 2021: Miami nung ki chirepba sülen Arogo aikati iba lendong agi kongshiba kibongtem yaridar; taoba hopta Miami nung 12 ben amentepa asüba ki chirepba lendong nung nisung 10 asü aser 150 shi samaba sülen Arogotemi relief agütsüba den külemi teyari balala agütsür.

Brihostibarnü (June 24) iba lendong atalokba sülen osangbenertem den jembidang Calvary Chapel Miami Beach nung Pastor J. P. Funk-i, "Hokolbarnü onoki sarasademtsüba den külemi iba lendong agi kongshirtem dang temeim mapa sayutsü atema lemteta liasü," ta metetdaksü.

Pastor-isa, "Iba lendong nung yirua alirtem tekaraba nung taneptsü angutsü aser mangyimertem melung süngzüksü atema onoki

sarasademtsür," Surfside nung aliba Champlain Towers South nung ya bendanger refugees, South America nungi arurtem aser Orthodox Yihuda nung liasü. Iba building nung Calvary Chapel Miami Beach Arogo nungi züngsem ana telidak liasü.

Iba lendong atalokba sülen Calvary Chapel Miami Beach-i temelaba meshiba sülen building chirepba anasa süki ka sütsüogo.

Chaplain Towers anasa aliba Arogoi süki sütsü aser nüngdakbapurtem nem chiyungtsü agütsütsü atema Arogo züngsemtem dang mepishi.

Amongnü Bay Harbor Islands anasa aliba Church by the Sea Arogoia lendong agi kongshirtem atema

ta sarasademtsüba den külemi teyari agütsütsü atema tenla benden.

Iba Arogo nung pastors Rob aser Barbara Asinger nati Facebook ajanga, "Timtemertem, shisablurtem aser mangyimertem den khuret lemsateptsü atema onok nem tashi agüjang. Teimla agütsürtem aser taneptsüba agütsürtem onok kümdakjang. Iba lendong nung yaritepertem- firefighters, emergency workers aser police ajanga Nü temeim mapa metetdakjang," ta lemsatep.

Billy Graham Evangelistic Association aser Youth With A Mission (YWAM) nungia züngsemtem Florida-i arua temeim mapa inyakogo.

Miami, Florida nung ki chirepba lendong nung nisung ter asü aser nisung 150 dak tema samaogo.

Methodist Arogoi kasa tetsür o tetsür na kibong akümstsü melar

June 30, 2021: UK nung tetsür o tetsür na mesüra tebur o tebur na kibong akümstsü melaba denomination tututibaji Methodist Arogo kümogo.

Bodhbarnü (June 30, 2021) Methodist Conference nung 'kibong akümbsa teratet' melenshitsü atema vote agütsütep aser kasa tetsür o tetsür na, aser tebur o tebur na kibong akümstsü melatsü atema vote 254 agütsü aser ibaji anema agütsüba vote bo 46 dang liasü.

Church of England mesüra Roman Catholic Church natibo kasa tetsür o tetsür na/tebur o tebur na kibong akümstsü memelar, ajisüaka Scottish Episcopal Church aser United Reformed Church na nungbo ibaji melar.

Methodist Arogo ya Britain nung Christian denomination tulutem rongnung jenjang

pezübuba nung lir. Methodist Arogo 4,000 dak tema nung züngsem 164,000 shi lir.

Arogo lenirtemi ashiba agi, taküm September ita tatembanglen nungi tenzüka Methodist Arogotem nung kasa o kasa na kiyimba sentong agitsü.

Dignity & Worth campaign group nung chair, Rev. Sam McBratney-i, "Nisung karibo küm aika tejaklen nungi iba anogo ajurutsü atema sarasadema liasü, aser tang iba ya atangji nung atalokogo ta mamangteter. LGBTQ pur tesendaktep atema mera tulu agiba atema onoki kasa

Methodists lenirtem dang pelar," ta metetdaksü.

Iba onük nung o toktepba mapang nung Methodist Conference nung taoba mapang tatong Tir, Carolyn Lawrence-i, kasa o kasa na kibong akümstsü atema vote

agüja agizükba anema Arogo nungi ainshitsü mesüra züngsem anentsüpur ishika dang lir, ta ashi.

"Tanü ya nisung aika atema arr ladangba anogo ka lir, aser nisung aikati onok tangatetba nungi pilatsüa akok ta bilemer," ta Lawrence-i metetdaksü.

2019 küm Methodist Conference nung iba onük agizükba sülen o lemteptsü atema local synods dangi yoka liasü.

Local synods 30-i kibong akümbsa teratet melenshitsü atema vote agütsü aser synod kati dang iba anemaji vote agüja liasü.

2020 conference nung 'kibong akümbsa teratet' melenshitsü atema vote agütsüteptsü sentong liasü saka coronavirus wara aliba agi yaküm iba conference thinena liasü.

ANO GO ABEN TSÜNGREM DEN

Atangji ken ken ibai tasak

Saka temeim nung ochi jembia ajak nung Pa dak asenok aintsü Paji tekolak, oda Khrista. Efesa 4:15

Telungjem nung inyaktsü Pauli Efesa nung ayongzük. Pai temang ka nung shilem balala aliba agi atishia jembi. Shilem shia mapaa balala lir. Kar tenyartem, kar ainkar, kar sayutsüngirtem, kar pastors aser kar tesayurtem. Arogo mapaji tenzüka mapa asoshi temeshipur renemtsütsübaji lir. Saka ano Pai kija den jembir, "Saka ochi jembia." Arogoji (temang) teti ochi jembitsüla, saka kija züngsemtemi (temang shilem) maneni ochiji sayutsüla.

Yisuji ochi! Tanela Temeshiji ochi Tanela (Yn. 16:13)! Khristan ama asenoki ochi kübok alitsüla. Aseni jembiba otem ochi asütsüla. Ochi jembitsübaji tetibo temela masür, aji oda süaka asenoki ochiji jembitsüla - temeim nung- shirnoki ibaji angashitsü nüngdaker. Ibai mekümzüki aliba kibong nung züngsemtemi, tembartem, külem mapa inyakertem, aser ibai tetibo temela masür. Saka parnok tatembang alizüng jagi asenok ajungshidaktsütsüla. Ano asenoki Khristan shirnoki yimya süpaa tiyazü jembir parnok den ochi jembitsü mulunga alitsüla (Gal. 6:11). Saka asenok alizüng teti Khrista nung anitsübaji asütsüla. Asenok maneni Khrista mesüka alitsüla, aser ibaji asenoki anogo shia Pa O nung mapang endokba ajanga kümtet.

Tsüngrem, ni teti temeim nung kechi ochi aser kechi nüngdak aji jembia tsüngchir süa linür. Tanü kü dang yariang ta ni sarasademer. Amen.

Pastor aser kentener Thelma Buckner arrshi küm 89 nung süogo



Thelma Battle Buckner

Buckner ya 1932 küm Mississippi nung aso aser lar kibong nung tanur 13 liasü.

1949 küm la Lexington, Mississippi nung aliba Saints Industrial Library School nung graduate asü aser küm ka dang lirbo Arthur Buckner den kibong aküm saka küm 10 lir pila.

Buckner ya osangtajung kentener ka liasü aser 1989 küm lai Minnesota Music Award nung Best Female Gospel Vocalist Award ngua liasü.

La ya kentener kibong ka nungi sotet aser lar semchir rongnung ka- Arthur "L.A." Buckner-ia yaküm iTunes jazz chart temaba jenjang nguogo.

Minnesota Ecclesiastical Jurisdiction of COGIC aser COGIC International ajanga la license missionary aküm aser 2002 küm lai Minnesota Graduate School of Theology nungi doctorate of divinity angu.

Lar chirnurtem ajaki ki toktsür aoba sülen la licensed daycare provider ka aküm aser tsürabur malir tanurtem lai anepalua liasü, iba sülen tesüsa lai lar kidang Buckner Emergency Shelter tenzüka maneni tanurtem anepalu.

Buckner-i lar adianu asem, lar tanur ti, semchir 28, tanaben semchir 41 aser tasemben semchir ka toktsür alima nungi pilaogo.

June 30, 2021: Minnesota nung aliba Gospel Temple Church of God in Christ nung mapang talangka pastor inyakla aser osangtajung kentener, Thelma Battle Buckner temelungjang tashidak agi süogo; la arrshi küm 89 liasü.

Thelma Battle Buckner-i Minnesota kübok Twin Cities area nung temeim mapa jenti inyakba ajanga la kanga nüngtugu aküm.

Mississippi nungi Buckner-i küm 15 tashi Gospel Temple Church of God In Christ nung pastor inyakla liasü.

Lai timtemer tanurtem aika yariba agi nisung aikati la dang 'otsü' ta aja.

La June 11, 2021 nü asüba sülen Gospel Temple Church nung la nem akhüm agütsüba sentong ka ayongzüka agiogo.

OLONG PAITEP # 5861

	1		2						3
4					5		6		
7									
			8						9
10								11	
							12		
13									
15									

TIPIEN		LANGTSÜNGLEN	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Süngo o tzü ajemba	- 5
7. Chiyungnü	- 3	5. Temenemtsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _ _ _ _ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _ _ _ _ _ jang	- 6	12. Tzü manung senzüba	- 4

OLONG PAITEP # 5860 TELANGZÜBA

TIPIEN :		LANGTSÜNGLEN :	
1. Rebeka, 4. Adam, 6. Yohan,		2. Kan, 3. IM, 5. Anüng, 7. Amsü,	
9. Zü, 12. Sayutsüngir, 15. Ku,		8. Yosep, 10. Sara, 11. Isak, 13. Yakob,	
16. Naman, 17. Abel, 18. Samuel.		14. Nana, 16. Noa, 17. Am.	



2021 JUNE ITA LILI RESULT !

June ita nung Lili tajungtiba (First) shimteta tanü yangi lephsia agütsür. Lili zülur-i July 10, 2021 tashi nung Tir Yimyim Office nungi senpet agizüksü mepishia metedaktsür.

ALOKBA O SOBANGBA NA ACCIDENT AJURUR :

Alokba o Sobangba na künü anogo pei pei gari bener lenkho ka nung speed mesottet accident ajurur tenaprongla garijibo anüka ajasa saka tenabo kacha meyiru nung süngmangseta jembir.

- Alokba** : Temba oda aseni sarasademer ayazükba agia, garibo yamai ajasayonga anabo temezünglaka meyiru, ya kechi sayatenya?
Sobangba : Atangjia temba, Tsüngrem tenüng sangdima, ataangjo, ai ni nungdak nung amshitsü Whisky pongdang ka inoka abenba kanga junga lir ya koda! Anabo anaprong kümzükba tanüng nung fifty fifty jemdi ang na tama agiang.
(Alokbai bottle half ka jemer tetemba nem agütsür)
Alokba : Temba ang, ni half ka jemogo tanüngbaji na asüokang.
Sobangba : Ni tangbo magitsüar.
Alokba : Wa, koda asü?
Sobangba : Tang police arua anaprongla dang asüngdangyatsüji Iba sülenang agijaar.
Alokba : Saalaa!!

Lilir : WhatsApp

TANÜBO NAI LANGZÜANG

Q. Aarogyam Healthcare Business Loan ya ___ ajanga lapoktsü.

- A.SBI B.KVB C.RBI D.PNB

(Taruba adok nung onoki langzüksü)

YASHI ADOK TELANGZÜBA : Kerala

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Khen

(adv) mapag ka atema, teti masü (once)

* Imlibilema na ozü kidangi **khen** arung.

Ken

(n) tebang nungi ola balala adoka atenba (song)

* Aor sobaliba **ken** tanganütsüka atener.

NAI-A YA METETTER MA?

JULY 2021 TONGTIPANG ANOGOTEM :

- 1 July National Doctor's Day
- 1 July National Postal Worker Day
- 1 July Canada Day
- 1 July Chartered Accountants Day (India)
- 1 July National U.S. Postage Stamp Day
- 1 July National Gingersnap Day
- 2 July World UFO Day
- 2 July National Anisette Day
- 3 July National Fried Clam Day
- 4 July Independence Day USA
- 6 July World Zoonoses Day
- 11 July World Population Day
- 11 July National 7-Eleven Day
- 12 July National Simplicity Day
- 12 July Paper Bag Day
- 14 July Bastille Day
- 17 July World Day for International Justice
- 18 July International Nelson Mandela Day
- 22 July Pi Approximation Day
- 22 July National Refreshment Day (Fourth Thursday in July)
- 24 July National Thermal Engineer Day
- 26 July Kargil Vijay Diwas
- 25 July National Parent's Day (Fourth Sunday in July)
- 28 July World Nature Conservation Day
- 28 July World Hepatitis Day
- 29 July International Tiger Day
- 30 July International Friendship Day
- 30 July System Administrator Appreciation Day (Last Friday in July)

SUDOKU # 5901

TELANGZUBA # 5900

5		7	4	9	8				5	3	9	7	4	8	2	1	6
6					5	9		8	8	7	2	1	3	6	5	4	9
2				1	6		5		1	6	4	5	9	2	3	7	8
8	5	1	9				4		9	5	3	2	8	7	4	6	1
			6	5	1		9	7	6	4	8	3	1	9	7	2	5
7		9			3			2	7	2	1	6	5	4	8	9	3
	4	5	3		2				3	9	7	4	6	5	1	8	2
	7	2	1			6		5	2	8	5	9	7	1	6	3	4
	8	6			9	1			4	1	6	8	2	3	9	5	7

OJANG LUTEP # 5446

- ISASHBULU :
- TEMIMT :
- ERAS :
- KENNEBELEM :
- NGNU :
- BAALI :
- PANMAG :
- AK :
- TPTSANEÜR :
- URAJU :

OJANG LUTEP TELANGZÜBA # 5445

MEZÜNG DANG NUNGI KANGA AGI TAJUNGBA INYAKTSÜ ASOSHI TEMULUNG AGÜJANG

TAN HOPTA ATEMA - KOMA SÜLA ?

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?

Olong 20 shi nung July 02, 2021 tashi nung iba telangzüba ya onok dangi (e-mail - tiryimyim@gmail.com) : (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsüsü.



Noida, June 30, 2021: Linük nung petrol aser diesel jenjang atuba anema Bodhbarnü Noida nung Congress züngsemtemi longkak aitdang police-i nokdangba noksa nung angur.

Totzü jenjang atuba anema July 7 nungi Congress-i longkak aittsü

New Delhi, Aami/June 30 (Agencies): Centre sorkari gari totzü jenjang maneni atuba atema sorkar aija Bodhbarnü Congress Party lenir, Rahul Gandhi-i, public transport atema nisung tarensena nokdakba ya coronavirus anema tenokdangba aliba ajanga dang masü, saka totzü jenjang kanga atuba agi lir, ta ashi.

Rahul-i twitter ajanga, "Public transport atema nisungtem tarensena nokdaka aliba ya coronavirus tenokdangba ajanga dang masü. Ner yimti nung petrol-diesel jenjang reprangdang nung nai iba kuliji metettsü," ta

metetdaksü. Gari totzü jenjang atuba aser osettsüset jenjang atuba anema July 7 nungi tenzüka Congress Party-i anogo 10 nü linük tesem ajaklen longkak aittsü.

"Covid wara ajanga nüburtem timtemba, mapa manguba tebilemsü aser itasen ajema agütsüba ajanga nüburtem timtemba reprangteta Congress Party-i Block, District aser State levels nung linük tesem ajaklen longkak aittsü lemtetogo. Item program ya July 7 nungi July 17 tashi State units-i ayongzüka agitsü," ta Congress sangdong ka ajanga metetdaksü. "Longkak aitba sentongtem

nung Congress Party nung lenirtem, AICC frontal organisations- Mahila Congress lenirtem aser züngsemtem aser linük tesem ajungalen party pusemertemi shilem agitsü," ta party sangdong nungsa shia lir. Congress lenirtem aser party nung inyakertemi district shia nung 'Cycle Yatra' agitsü aser state level nunga longkak aita jajatsü. Iba dak alia petrol pumps nung signature campaign agia totzü jenjang ajemang, ta takhangba agütsütsü.

Linük nung totzü jenjang maneni atur, aser state aika nung petrol litre ka nung sen 100 jungogo.

India nung ano nisung 45,951 dak Covid putet aser 817 asü

New Delhi, June 30 (Agencies): India nung ano nisung 45,951 dak coronavirus putetba sülen tang tashi nungbo linük nung nisung 30,362,848 dak coronavirus putetogo, ta Bodhbarnep Union ministry of health & family welfare (MoHFW)-i metetdaksü.

Tesüiba ghonda 24 nungsa linük nung coronavirus agi shiranger 817 süogo, aser iba tashidak agi asür ajak senteperbo 398,454 jungogo.

Health Ministry-i ashiba agi, Nationwide Vaccination Drive kübok tang tashi nung coronavirus vaccine dose crore 33.28 agütsüogo. Tang linük nung iba

tashidak agi teshirangdakpur 5,37,064 dang kümogo aser ibaji coronavirus caseload nungi shilem 1.77 dang lir.

Mongolbarnü linük nung coronavirus samples 19,60,757 tendanga liasü aser tang tashi nungbo samples ajak senteper 41,01,00,044 tendangogo, ta Bodhbarnep Indian Council of Medical Research (ICMR)-i metetdaksü.

Tanü agi anogo 48buba anogo shia iba tashidak putetba dang nungibo shiranger anepba timba. Tang tashi nung linük nung iba tashidak agi shiranger 2,94,27,330 anepogo aser iba tashidak agi shiranger asübabo

shilem 1.31 dang lir. Tesüiba ghonda 24 tsünga coronavirus agi asürtemji (817) timbaka Maharashtra, Tamil Nadu aser Karnataka state tem nungi lir.

Tang tashi nung linük nung coronavirus tashidak agi nisung 3,98,454 tashi süogo aser nisung timba asüba state temji Maharashtra (1,21,804), Karnataka (34,929), Tamil Nadu (32,506), Delhi (24,971), Uttar Pradesh (22,577), West Bengal (17,679) aser Punjab (16,033) state tem lir.

Health ministry-i ashiba agi, asürtem shilem 70 bo comorbidities ajanga asü.



June 30, 2021 nü National Media Centre, New Delhi nung Union Ministers- Prakash Javadekar aser Ravi Shankar Prasad nati Cabinet aser CCEA-i telemtetba balala agiba dak sendakba nung osangbenertem den jembiba noksa nung angur.

Delimitation Commission-i J&K nung party balala ajurutsü

New Delhi, June 30 (Agencies): Jammu & Kashmir nung Parliamentary aser assembly constituencies yanglushitsü atema mapa lemzüka aliba delimitation committee-i July 6 nungi July 9 tashi J&K Union Territory semdangtsü, iba mapang nungji parnoki sorkar ketdangsertem, party balala nungi lenirtem aser lokti lenirtem ajurutsü.

Bodhbarnü New Delhi nung Election Commission office nung delimitation commission senden amenba mapang nung Jammu & Kashmir semdangtsü lemtet.

ECI-i sangdong ka ajanga, "Delimitation maparen mapang shidak nung tembangtsüsa delimitation commission-i stakeholders ajak dang amalitepa tebilemba onük tajung lemsatepdaktsüner," ta metetdaksü.

ECI ketdangser kati ashiba agi, UT nung aliba district 20 nung District Election Officers aser Deputy Commissioners ajak dang Jammu & Kashmir Reorganisation Act, 2019 nung ajemdaker delimitation dak

sendakba osang bendenang, ta tuyuogo. June 23 nü Election Commission-i video conferencing senden ka nung J&K nung lenirtem aser deputy commissioner tem den Jammu & Kashmir nung assembly constituency 90 nung delimitation atema o lemtepa liasü.

Iba sülen June 24, 2021 nü Ato kilonser, Narendra Modi-i J&K nungi party balala nungi lenirtem den senden mena J&K nung yimtenren mapa tenzüksü atema jembiogo.

Küm ka atema 2020 küm March ita nung retired Supreme Court judge Ranjana Prakash Desai leniba nung züngsem aseme akümba Delimitation commission tenteta liasü, saka maparen metembangba agi ano Centre sorkari küm ka atsülangtsüogo.

Jammu & Kashmir Reorganisation Act 2019 ajanga J&K nung Union Territories ana kümtsü. Iba Act ajanga J&K Legislative Assembly nung menden 107 aliba nungi 114 kümtsütsü.



June 30, 2021 nü Congress lenir, Navjot Singh Sidhu-i New Delhi nung Congress General Secretary, Priyanka Gandhi'er kidangi oa la ajuruba mapang tangokba noksa nung angur. Tang Punjab nung Sidhu aser Punjab CM Amarinder Singh na tsünga mangatettep adoka lir. Chief minister Amarinder-i, Sidhu deputy chief minister mesüra Punjab Pradesh Congress Committee (PPCC) Tir shimtsüji pai khenyongi memelunger, ta shiogo.

July 19 nungi tzüngluruwa mongpu Parliament tenzüksü

New Delhi, June 30 (Agencies): Tang India linük nung coronavirus case ajema akümba aser vaccination programme takok nua agiba nung ajemdaker July 19 nungi tzüngluruwa mongpu Parliament tenzüksü, ta osang ka ajanga metetdaksü.

Parliament House anaprongla nung July 19 nungi senden tenzüksü aser August 13 nü tembangtsü, ta kasa osang ajanga metetdaksü.

Tzüngluruwa mongpu senden ya teti agia July ita tasembuba hopta nung tenzüker aser Independence day (August 15) matongdangsa tembanger.

Cabinet Committee on Parliamentary Affairs-i Parliament senden ayonga agitsü atema tebilemba onük ka benokogo aser kobi melii anogotem tejangja sangdongtsü.

Parliament complex nung coronavirus dak sendakba

inyakyim ajak shidak bentshitsu, aser MP tem ajak coronavirus vaccine dose kakabosa agir alitsü.

Parliament annexe building nung MP tem aser parnok kibongtem vaccine agitsü atema vaccination facilities renemogo.

Parliament nung inyaker kati ashiba agi, June 19 tashi nung Lok Sabha züngsem 400 dak tema vaccine agiogo saka iba dang nungjagi timba asütsüa akok, kechiyong MP aikati peipei state nung vaccine agiogo.

Lok Sabha nung osangbenertem atema-a Lok Sabha secretariat nung vaccination facilities lapoktsüogo. Covid telatetba nung ajemdaker taoba mapang Rajya Sabha senden anepdang 9:00 ako nungi nikongdang 1:00 ako tashi aser Lok Sabha senden nikongdang 4:00 ako nungi tenzüka liasü.

China nung küm 70 raraba sülen ramen madak takok nguogo

Geneva, Aami/June 30 China ya 40 puba kumogo. (Agencies): Merila agi menatepa aoba tashidak, ramen azüoktsü atema küm 70 raraba sülen World Health Organization ajanga China ya ramen maliba linük ka, ta Bodhbarnü kuli agütsü.

1940s nung iba linük nung küm shia ramen tashidak nisung million 30 shi dak puteta liasü, saka tangbo küm pezübuba linük nung iba tashidak mali arur.

"Ramen nungi linük anitetba atema onoki China nung aliba nübür nem tenüngsang agütsür," ta WHO director-general Tedros Adhanom Ghebreyesus-i ashi.

Parnoki meranga inyakba nungi takok angu, koba küm aika jelia nükjidorong yur tanen makai inyaka liasü. Iba sangdong ya ajanga, tarutsü nung ramen samadaksütsü nükjidorong tongtettsü ta aliba dang sayutetba linük timba akumba nung China adener."

Küm asem atonga linük telungzük nung ramen poktetba maliba linüktemi WHO dang ramen maliba jenjang agütsütsü atema asüngdangtsü akok. Parnoki kuli tejangja sayutetsüla aser tashidak ya tanaben poktetshiba mapang nokdangtsü asoshi renema aliba tashi sayutetsüla.

Geneva nung amenoka aliba WHO ajanga ramen maliba kuli agütsüba territory rongnung

Tesüsa iba jenjang ngutetba linüktem ya El Salvador (2021), Algeria aser Argentina (2019), aser Paraguay aser Uzbekistan (2018) alitsü.

Ramen kodanga maliba mesüra mera balaka magiaka samaba linük 61 lir.

Küm 30 dak tema nung WHO indang Western Pacific region nung ramen mali ta kuli agütsüba linük mezüngbubaji China ya alitsü.

Iba region nung iba jenjang agütsüba aliba linüktemji Australia (1981), Singapore (1982) aser Brunei (1987) dang lir.

Iba tashidak anema alima renlokba kangabo mali, talisa African linüktem nung iba tashidak ya kanga bulua lir aser nisunga asür, ta WHO indang World Malaria Report 2020 ajanga ashi.

Küm shia agütsüba osang, koba November ita sangdonga liasü, yangji ashiba agi, 2000 nung iba tashidak yagi nisung 736,000 shi takum samatsü, koba agi 2018 nung nisung 411,000 aser 2019 nung nisung 409,000 takum samaja liasü.

2019 küm aliba nung ramen agi nisung million 299 shi menepa liasü, koba tesüba küm pezü tsüngta temelenshi mali arur.

Ramen agi asüba ya shilem 90 dak tema Africa nung lir, timbaka tanurtem alitsü, koba nosung 265,000 dak tema alitsü.



Bangladesh nung July 1 nungi lockdown tenzüktsü lia, Dhaka tezülen Munshiganj nung aliba Shimulia ferry terminal nungi rong ka sünga nisung mener ayamesoba noksa nung angur.

Afghanistan arrtsü nung khatep; Pakistan sepai asü

Islamabad, Aami/June 30 (Agencies): Mejangjaba nisungtemi Afghanistan indang Paktika province kübok arrtsü alema injang khaloktsüba mapang Pakistan sepai ana asü, ta linük mitkartemi ashi, aser Afghanistan dang par arrtsülen security tajungba nung keddangtsü ayongzüker.

North Waziristan region kübok military post nung aliba Pakistan sepaitemia meyiper injang khaloktsü, ta Pakistan mitkartemi Bodhbarnü sangdong ka nung ashi.

"Pakistan-i mapang shia Afghanistan dang par tsütsü arrtsü kanga junga azüoktsü jembia arur," ta Pakistan-i

sangdong tongmelang ka nung ashi.

"Pakistan nunger anema kiralongra mapa inyaksü atema Afghan li maneni amshiba asoshi Pakistan-i khukhua aitsür."

Tehreek-e-Taliban Pakistan (TTP) aser par den sendaktepa aliba telok temi linük sepai dak amaker, ta Pakistan-i maneni tai tongloksüba mapang iba lendong ya ajuru. Tehreek-e-Taliban Pakistan (TTP) aser par den sendaktepa aliba telok ya Afghanistan anüdoklen amenoka lir, ta ashir.

Tang tesüsa tai tongloksüba atema Afghanistan nungi telangzüba agütsüba mali, saka

taoba mapang par li nung item amala telok amenoka operation agitsü sorkari mela mali, ta shia arur.

Linük ana tsüngta arrtsü kilometer 2,600 nung yinzü agi atsübangtsü sentong yangluba Afghanistan-i anema nokdak aser arrtsü mangatetep lir, ta ashir.

Telungpur arrtsü alema aitiba azüoktsü mechi Pakistan-i par molung agi 2017 küm March ita nungi arrtsü atsübang tenzük.

Yinzü agi arrtsü atsübangba maparen ya Pakistan indang Khyber Pakhtunkhwa aser Balochistan province tem nung maneni inyaker.

Myanmar nung tepuokdak alir nisung 2,000 chioktsü

Naypyitaw, Aami/June 30 (Agencies): Myanmar mitkar keddangtsürtemi linük tesem balala nung tepuokdak yua aliba nisung 2,000 shi chioktsü sentong lir, ta Bodhbarnü osangtem ajanga ashi, aser mitkar tashi amshia sorkar atsüngdokba anema longkak aitiba nung actor aser nüngtugu nisungtemi shilem agiba atema ken o benoka aliba mitkar lanirtemi agentsür, ta state television ajanga ashi.

Tepuokdak alir nisung 700 shi Yangon kübok Insein jail nungi chioktsü, ta prison chief Zaw Zaw-i osangbener dang ashi. Ajisüaka iba tepuokdak tesem tulu nungi shibasa chioktsü, iba indang tejangjabo mashi, kong longkak aitiba mapang shilem agir kar puoka yua lir.

Honibarnü nungi tenzüka tepuokdak alirtem chioktsü ta olulu lir, aser yangji alir kinungertem karbo iba tepuokdak kimalen adenshi. Tepuokdak alir karbo shioktsü südi ta teimla nung nisung noklang ishika Bodhbarnep

tepuokdak kima adenshia liasü. April ita mitkar yimsüsürtemi New Yeas amnesty kübok tepuokdak alir nisung 23,000 dak tema chioktsü totuyuba agütsüba liasü, saka yangji February 1 nü mitkartemi sorkar atsüngdokba sülen apurbo ishika dang liasü.

Mitkartemi yimsü asüba anema lokti balalai longkak aitiba aser civil disobedience movement nung shilem agiba mechi nüngtugu nisung 24 tashi aputsü bushia aliba ken o mitkar indang sorkari agiener anogo ka lir iba osang ya angashir.

Election ajanga shimtetba civilian lenir Aung San Suu Kyi indang sorkar nungi mitkartemi tashiyim amshia sorkar atsüngdokba anema nokdaker nisung noklang aika aputsü bushiba rongnung actor, saisaponger, social media nung nüngtugu nisungtem, doctor aser tesayurtem dena liasü.

Nüngtugu nisung 120 shi aputsü bushiba rongnung kentener Lin Lin aser Chit Thu Wai, actor Phway Phway,

Eandra Kyaw Zin aser Pyay Ti Oo aser model May Myat Noe dena lir. Actor aser model Paing Takhon, shiba Myanmar aser Thailand nung kanga nüngtugu lir, pa ya April ita pua liasü aser actor Pyay Ti Oo aser pa kinungtsü Eandra Kyaw Zin nati tena sasa police matsüngdang bendanga agütsü.

"External factors" ajanga parnoki shilem agiba mechi par 24 anema ken o benoka aliba agien, ta mitkartem meyang television channel, Myawaddy ajanga ashi.

Tashi rakzükba sülen mitkartemi junga yimsü mesüteti anogoshi nübürtemi longkak aita sorkar aser nija business tem marakzüteti kumdaktsü. Ajidang masü tesem balala nung sorkar anema nokdaker timba akumer.

Sorkar atsüngdokba sülen nisung 2,000 jungnüa aputsü totuyuba agütsüogo, ta Myanmar tensa asadanga tentet, Assistance Association for Political Prisoners ajanga ashir. Tang nisung 5,200 dak tema tepuokdak yua lir, ta

parnoki ashir.

Arishi küm 76 tain Nobel Peace Prize sempet ngua alila, Aung San Suu Kyi ya February 1 nungi tepuokdak yua lir.

La anema süpokrem amshiba, covonavirus özüng nung aibelenba, özüng alema walkie-talkie amshiba aser linük anema mapa tamajung inyakba ken o tem benoka lir, saka item taitsüba ya la indang okatsüri magizüker.

Tamang makatsü kuli kar benoka lir aser obendanger temi itemji amshitsü mela, ta Aung San Suu Kyi'er okatsür telok nung tekolakba, Khin Maung Zaw-i osangbener dang ashi.

Item rongnung mitkartemi sorkar atsüngdoker anogo ishika lir Aung San Suu Kyi'er National League for Democracy (NLD) party ajanga agütsüba shidi dena lir, koba social media nung ayimsünga prokshia liasü.

Shidi ka nung embassy tem dang mitkar sorkar magizüktsü ajungshia liasü, kong Aung San Suu Kyi mesüra menden nungi atsüngdoker aliba Tir Win

Myint aser taoba mapang Naypyidaw mayor inyaksang Myo Aung nunger katia meyangnem magütsü, ta Khin Maung Zaw-i ashi.

"Document tem nung meyangnem mali. Parnoki item document ya internet nungi agizük," ta pai ashi.

"Parnoki document tem ya komasür agizük, kechi technology amshia agizük, itemji shia mali... parnoki court nung dang agütsü. Anungji onoki yangji tai apur."

Aung San Suu Kyi-i nübürtem den ya lar okatsür ajanga dang jembir.

Lar okatsür telok nung züngsem Min Min Soe-i osangbener den jembiba mapang lai nübürtem dang imlibilema lungjema alitsü ajungshia liasü, ta ashi.

Russian news agency Sputnik den mitkar lenir General Min Aung Hlaing-i sensaksemba mapang, Ni obendanger ka masü. Anungji Aung San Suu Kyi kechi tia ajurutsüar ni meteta mali. La dak kechi inyaksü, itemji ni totuyuba magütsütet," ta shia liasü.

Fazl Ali College nung Arju ka semzükogo



Dimapur, Aami/June 30 (TYO): Fazl Ali College, Mokokchung nung June 30 nü 1:00 ako nung KETSANGRIJU: Indigenous Skills Training Centre lapokba sentong agiogo. Iba Arju ya Chuchuyimpang Village Council-i tenla agüja lasü.

Ketsangriju ki ya Fazl Ali College nung kaketshirtem nem Indigenous Skills aser Vocational Course balala agütsüsa atema centre ka ama College-i amshitsü. Nisung ka libaliro aser yimayimpong renloka aotsü atema pei sobaliba aser libaliro nung tera yangloka alitsüji kanga tongtibang. Kaketshirtem alima den mezübelang masü tsüngda pei tera jangjaa ayutsüji kanga tongtibang. Chuchuyimpang

Rionsanger Putu Tatar Menden-i tenla agütsüba Arju ya college asoshi kaketshisatsü bushiloka aobanung mejaketa atuba long ka ama asütsü.

Arju lapokba sentong ya IQAC FAC Member [Asstt. Prof. Ao Dept] Toshisangla lenisüba nung agi aser Principal, FAC Helen Jamir-i okila jebia lasü. College tenügnung lai Chuchuyimpang Village Council nem college campus nung kanga danga nüngdaka aliba centre/ Arju ka yanglutsüba atema tenüngsang agütsü.

Kasa mapang nung Chuchuyimpang Village Council Chairman-ia, Nagaland nung college tejentiba nem council tenügnung nung Arju tenla agütsüta atema nema danga bilemba lemsatöp. Arju

yanglutsüsa atema village council den college ketdangsurtemi 2021 küm March 5 nü telemtetba agi. Paisa, Ketsangriju ajanga tarutsü tangazüker meyirejang aika nem tajangzük agütsüsa imlaba lemsatöp. Iba ki yanglutsü atema nisung asem nem nongloksü aser sen 5,39,790 intoka iba ki yangluogo.

Maneni Tzusapang Baptist Church Pastor, Rev. W. Spong Kichutzar-i iba ki meshiteta sarasademja lasü.

Sentong nung College IQAC züngsemtem aden aser tanungba faculty züngsemtem live streaming ajanga shilem agia lasü, ta Fazl Ali College, Information and Publicity Cell sangdong ka ajanga metetdaksü.

Mon nung tesayurtem training agi



Dimapur, Aami/June 30 (TYO): June 30 nü Sacred Heart School, Mon nung Tobacco Free Educational Institution (TOFEI) onük nung ajemdaker tesayurtem nem training agütsüogo. Iba sentong ya District Tobacco Control Cell (DTCC) Mon-i ayongzuka, COVID-19 tetuyuba sülen anidaka kanga takok nung agiogo. Sentong shilem ana kuma lemsar agia lasü.

Mezüngbuba shilem "Adverse effects of Tobacco consumption" onük nung ajemdaker agi aser tanabuba shilem "Tobacco Free Educational Institution (TOFEI)" onok nung ajemdaker

agia lasü. District Nodal Officer, NTCP Mon, Dr. I. Simon Sumi-i, moko agi yangluba chiyongtsütem achiba ajanga temang nung timtem agütsüba indang lemsatöp. Paisa, moko agi yangluba chiyongtsütem achiba ajanga lokti nung koda Coronavirus tashidak menatöp aoe, iba indang jembi.

Kasa mapang nung District Consultant, NTCP Mon, E. Nyeamyang Konyak-i, TOFEI guidelines indang rasaaa ashi. Lai, school ka tobacco free ta sangdongtsü atema criteria tem aser Tobacco Free School ta sangdongtsü atema school temi

agitetsü aliba jenjangtem indang lemsatöp.

Maneni Mon district kübok school tenet Tobacco Free School ta sangdongogo aser item school tem nem TOFEI Certificate agütsüogo. Tobacco Free school ta sangdongba school tem rongnung Sacred Heart School Mon, Green Valley School Mon, Green Mount School Mon, Eastern School Mon, Eastwood School Mon, Police Unit School Mon aser Holy Cross School Mon densema lir.

Iba training sentong nung school balala nungi tesayur aser institution tekolaktem 27-i shilem agia lasü.



Rotary Club Dimapur aser G.P.S THILIXU BL-4 School Management Committee na longjemer achool meketa atsü atsütsüogo aser iba den tetsür aser teburtem atema metsümeshidak balala yanglutsü aser sorchiokdak yanglushija lasü. Maneni kaketshirtem atema handwashing Station, drinking water facility, white board aser sports items tem agüja lasü. Iba project ya Rotary International RILM flagship program, Happy School kübok achaayanga inyaka lasü.

SÜR KÜM KA JUNGAKA MAMATETER

Asür I. Senkameran Imsong (Asangma)

1-07-2020 - 1-07-2021



Temiem Oba,

Tanü anogo ano kina kanga dang menügra bilemteter. Nü tesüngmangtsü temeim aser sempet tajungtem onok mulungjang nung teti lir. Oba, tanü onoki na bilemteta sarasadema amonger.

Kinungtsü, Chinurtem, semchirtem aser kinüngertem.

Pungro temeket nung maneni vaccine agütsüdar



Dimapur, Aami/June 30 (TYO): ADC, Pungro, Abhinav Shivam, IAS aser Medical team-i achaayanga June 30 nü Pungro jila aser kidanger yimtsüngtem nung vaccine agütsüba sentong ka ayongzuka agiogo.

ADC-i sangdong ka ajanga ashiba agi, vaccine agütsüba mapang olulu osang aika prokshiba ajanga tetsükdaksü aika ajangshiogo, saka vaccine agitsü koda tongtibang, iba indang angateta ashiba sülen nüburtemi angateta telongjunga

aru vaccine agiogo, ta ashi.

Vaccine ya Pongru jila kübok Rest House ward, Officers ward, Badminton ward, Likimro Hydro Electrical Project nung aser Longkhimong o Tsurewong yimtsüng nung nüburtem nem agüja lasü.

Vaccine agütsüba sentong ayongzuka agiba mapang nisung 167 nem vaccine agütsüogo. Medical team ya Dr. Sato, Dr. Kisheka aser Dr. Siku nunger lenisüba nung inyaksangshia lasü.

SEWA international-i yimtsüng 20 nem tenla agütsü

Dimapur, Aami/June 30 (TYO): SEWA international-i, June 19 nü Kiphire district kübok kinük nung aliba yimtsüng 20 nem Covid nungi jenboa alitsü atema amshiba osettem tenla agütsüogo.

Nagaland Angh-i teyari agütsüba ajanga iba tenla agütsü. Osettem ya Deputy Commissioner aser Kiphire District GBs Association General Secretary nati agizüka lasü. Osettem agizükba sülen DC-i, tang ama tensa majungba

mapang teyari tulu agütsüba atema SEWA International aser Nagaland Angh dang kanga pelaba lemsatöp lasü.

Osettem ajak district administration ajanga yimtsüng nung GB tem nem lema agütsüogo. Osettem rongnung oximeters, glucometers, digital thermometers, hand sanitizers, 3 ply masks, N95 masks, Gloves, Face shield aser mozütem densema lir, koba yimtsüng nung kibongshia nem lema agütsüsa.

Euro 2020: England aser Ukraine na quarter-i iogo

Aami/June 30, 2021 (Agencies): Mongolbarnü Germany den asayaba mapang Raheem Sterling aser Harry Kane nati England atema goal kaka idakja parnoki asaya goal 2-0 agi kokogo.

Wembley nung asayaba mapang asaya atemtsü minute 15 anunga lia Sterling-i mezüngbuba goal idaktsü aser iba sülen Kane-i tanabuba goal idakja 1966 küm sülen tang mezüngbuba knockout stage nung England-i Germany kokogo.

Küm 55 tejakdang World Cup final nung England-i Germany akokba sülen parnoki khen danga mekoki aruru tang mezüngbuba koktetogo.

1970, 1990 aser 2010 World Cup tem nung Germany-i England tsükdaktsü aser Euro

96 semi-finals nunga England-i Germany makok.

Mongolbarnü goal idaktsüba sülen Sterling-i iba asayamung nung tang tashi nung goal asem idakja lir aser Kane-i tang mezüngbuba goal ka idaktsüogo.

Iba asayamung nung England team tang tashi nung goal ka danga chia mali aser parnok Honibarnü Rome nung Ukraine den quarter final asayatsü.

European Championship puti otsü nung England team-i knockout stage nung tang agi asaya tanabuba-ang koktetogo aser 1975 küm sülen tang mezüngbuba Germany team kokogo.

Kasa asayamung nungsa Ukraine-i goal 2-1 agi Sweden madak takok ngua Euro 2020 quarter-final tongtetogo.

2006 küm World Cup nung

quarter final tonga asayaba sülen Ukraine-i tang agi tanabenbuba ang asayamung tongtibang ka nung quarter final tongtetogo.

Atakzükja aliba asaya mapang tembangba tashi nung telok anapronglai goal kaka idaktsür liasü. Asaya nung Ukraine atema Oleksandr Zinchenko goal ka aser Sweden atema Emil Forsberg-i goal ka idaktsür liasü, ajisüaka mapang apuloktsür asayaba mapang Sweden nung defender Marcus Danielson nem red card agütsür tugudaktsüba sülen asaya melenshi.

Penalty asayatsü atema imlaseta asayaa aliba mapang Dovbyk-i minute 121buba nung Ukraine asoshi tanabuba goal idakja parnoki asaya akok.

Khel Ratna Award atema Chhetri tenüng benoktsü: AIFF



Aami/June 30, 2021 (Agencies): Rajeev Gandhi Khel Ratna award atema Indian national football team captain Sunil Chhetri tenüng benoktsü asoshi All India Football Federation (AIFF) renema lir. Pa tenüng benoktsü atema kuli kakettem ano mebenoki lir, ta ketdangsur kati ANI dang ashi.

Ministry of Youth Affairs and Sports-i, National Sports Awards 2021 atema asayartem tenüng benoktsü asoshi tatembangbuba anogo atsülangja June 21 nü nungi benokdar.

Khel Ratna ya India nung saisapong dak sendakba nung naroküm tematiba lir aser taoba küm mezüngbuba iba naroküm asayar pongu nem agütsüogo. Asayartem rongnung Rohit Sharma, Manika Batra, Vinesh Phogat, Rani Rampal aser Mariyappan Phangavelu nungeri iba naroküm agizük.

India tetsür ODI aser Test captain Mithali Raj aser tebur team nung asayar offspinner

Ravichandran Ashwin na tenünga Rajiv Gandhi Khel Ratna award atema BCCI-i benoktsü ta osang angazükogo.

Iba ita tetenzüklen Bangladesh den asayaba mapang goal idaktsüba sülen Chhetri-i Lionel Messi (goal 72) ajateta liasü, aser tang football tasayadak alirtem rongnung temaba jenjang nung aliba asayar Cristiano Ronaldo (103) sülen temaba jenjang nung züngoksema lir. Ajisüaka Argentina nung nungtugu asayar den pa khenyongi medemdangtsü makok ta shiogo. "Messi den ni khenyongi medemdangtsü makok," ta Chhetri-i ashi, shiba international goal 74 idaktsür lir.

"Top goal scorer chart reprangba mapang India nung ka ama second pongu pelang aser aji tatem. Ni aser Messi na indang amatokang, kechiyong ni densema alima ajunga Messi indang fan lir," ta Chhetri-i ashi.

Ajisüaka Mongolbarnü Lionel Messi (75)-i international goals tally nung Sunil Chhetri ajatetogo. Mongolbarnü Copa America 2021 asayamung nung Bolivia goal 4-1 gi akokba asaya nung Messi-i goal idakja Sunil ajatetogo.

Messi tang goal timtiba idaktsürtem rongnung Hungary nung Sandor Kocsis, Japan nung Kunishige Kamamoto aser Iraq nung Bashar Abdullah nung den jenjang tekububa nung lir. Sunil Chhetri jenjang 13buba nung lir.

Everton head coach asütsü Benitez shimba sangdongtsü imlar

Aami/June 30, 2021 (Agencies): Everton-i parnok head coach asütsü atema taoba mapang Liverpool manager Rafa Benitez shimba sangdongtsü imlar, ta British media-i Mongolbarnü metetdaktsü. Osang ajanga ashiba agi, Benitez-i küm asem inyaktü atema mulunga agizükogo.

Carlo Ancelotti-i, June 1 nü Real Madrid-i meyipa aotsü atema telemtetba agiba sülen Everton pur coach tasen ka bushia liasü. Carlo lenisüba nung Everton pur taoba season Premier league nung jenjang 10buba nung tembanga liasü.

Arishi küm 61 tain Benitez shimtsü atema Everton puri sensaksem tenzükba sülen club pusemertemi tebilemba balala adokogo. Benitez-i 2007 küm February ita Anfield nung Liverpool den goal ka danga

magütsüteti asaya kasasa nung tembangba sülen Everton ya club tilaka ta ashiba ajanga mepetmesü adok.

Wirral nung Benitez'er kibong aliba tesem anasa banner ka nung, "onoki na kong alir meteta lir, tenangzüktepba teyanglu," ta zülua toktsür aliba Merseyside Police-i bushitsüngdangdar. 2004 küm pai Liverpool coach mapa agizükba sülen parnok iba tesem nung alir.

William Edward Barclay, shiba 1890s nung Everton in charge liasü aser tatsüka lir Liverpool club-i ao, pai dang Merseyside team anaprongla achaayangdanga lir.

Benitez-i 2010 küm tashi küm trok Liverpool coach mapa inyakogo aser iba mapang pai 2005 küm Champions League aser taruba season nung FA Cup

takok dangi club ani. Paisa, 2013 küm Chelsea team Europa League takok dangi ani.

Napoli nung season ana aser Real Madrid nung mapang tatsüka inyikba sülen Benitez tanaben England-i meyipa arua Newcastle United coach mapa aben.

Iba season nung Newcastle United pur relegate asü saka taruba season nung Benitez lenisüba nung Newcastle-i second-tier title bena tanaben PL-i ait.

Ajisüaka club kibur Mike Ashley den mangatetep adokba ajanga 2019 küm pai club toktsür ao. Iba sülen Benitez Chinese Super League-i ao aser pa lenisüba nung Dalian Professional team asaya saka COVID-19 wara poktetba ajanga tetsükdaktsü adoka pa January ita meyipa ao.

Dutee Chand Tokyo Olympics atema qualify süogo



Aami/June 30, 2021 (Agencies): India tsürtem rongnungi nungtugu asemteper Dutee Chand, World rankings quota ajanga Tokyo Olympics nung 100m & 200m races nung asemteptsü atema qualify süogo.

Chand-i, taoba hopta Patiala nung Indian Grand Prix 4 asayaba mapang alizüng 11.7 second nung tongteta lai yanglur aliba 100m national record yanglushi, ajisüaka automatic Olympic qualification time 0.02

second agi metongtet. 100m asemtepta nung Dutee jenjang 44buba aser 200m nung jenjang 51buba nung lir.

Odisha sorkari Mongolbarnü Rajiv Gandhi Khel Ratna Award atema Dutee Chand tenüng agütsüogo. Dutee dak alia Odisha sorkari asayar pongu tenüng sports ministry nem agütsüogo, ta ketdangsur kati metetdaktsü.

"Khel Ratna Award atema kü tenüng benokba atema

Odisha chief minister Naveen Patnaik dang kanga pelar. Nü temaotsü kü dak teti mungdakjang," ta Dutee-i tweet asü.

Arishi küm 25 tain Dutee, shibai 2018 Asian Games nung 100m aser 200m nung sivler medal ngutetogo, la nem taoba küm Arjuna Award agüja liasü.

Odisha sorkar, Sports and Youth Services Department-i ano Olympic nung asayatsü aliba Indian hockey vice-captain Birendra Lakra (Arjuna Award), hockey coach Kalu Charan Choudhury (Dronacharya) aser taoba sprinter aser Olympian Anuradha Biswal (Dhyan Chand) nung National Sports Award balala atema tenüng agütsüogo.

State sorkarisa, lanur asayartem jangjateta anitetba atema Rashtriya Khel Prostanhan Puraskar asoshi KIIT Deemed University aser Odisha Mining Corporation benokogo.

Australia tennis team nung Barty aser Nick denogo

Aami/June 30, 2021 (Agencies): Aruya aliba Tokyo Olympics nung, temaba jenjang ajangzükuteta alir tennis star, talisa Rafael Nadal aser Serena Williams nungeri shilem magitsü telemtetba agir aliba mapang, iba Games atema Australia indang tennis team nung, world No.1 Ash Barty aniokba osang sangoktsüogo.

Kanga dang yongya ataba asayamung nung, Barty-i anir Australia tennis team nungi züngsem 11 agi iba Games nung shilem agitsü terenemba lir. Olympic nung tennis asayamung tsütsü küm 17 tashi medal menguteti arur sülen, taküm Australia tennis team-i medal takok angutsü teimla nung yoker.

Barty dak alaka, Australia tennis team nung asayar talisa Alex de Minaur, Nick Kyrgios aser asayar tejen Sam Stosur nungeri shilem agiba angutsü. Stosur-i pungobuba Olympics nung shilem agitsü terenemba lir.

"Olympics nung shilem agitsü kü mangdang liasü aser linük tenüng nungi iba asayamung nung shilem agitsü

asoshi yongyaseter. Iba team uluba den telongjem lir aser külem team pur den iba Games nung asayatsü asoshi matateter," ta Barty-i ashi.

Tokyo Olympics - tennis asayamung nung, Barty, De Minaur, Stosur aser men's world no. 43 John Millman nungeri kija aser tarep asaya ajak nung shilem agitsü. Kasa mapang, Kyrgios-i kija asaya nungang tokteptsü.

Rio Olympics nung shilem agir tarep asayar takotet - Millman aser John Peers nati Olympic Games tanabuba nung shilem agitsü terenemba lir. 2004 Athens Olympic nung Alicia Molik-i mezüng bronze medal takok ngur külen nungi tan aruya aliba Tokyo Games nung tenati team atema medal takok angutsü teimla tulu lir.

Captain Molik-i anir tetsür team asayatsü, kong team rongnung tetsür kija atema Ajla Tomljanovic aser tetsür tarep nung Storm Sanders aser Ellen Perez na dena lir.

July 24, 2021 nü Ariake Tennis Park nung Tokyo tennis asayamung tenzükba asayatsü.

BILEMDANGANG

"Teyari agütsünera ola madoki agüjang."